

吳興掌故集

三

蘇平知

PDG

吳興掌故集卷之九

九霞山長徐獻忠輯

延州布衣吳夢陽閱

後學劉承幹校

古蹟類

夫世無百年之生而有千年之蹟士君子託興夷遠
委情周歷蓋有不忍泯忘者夫亦係諸其人也弔古
感世之士寧無所感發耶昔王右軍與客登覽烏山
輒慨然而歎曰百世之後誰知王逸少與諸君至此
乎嗟乎後之視今猶今之視昔微言逸表誰不愴然
思之述古蹟

烏程閣下生蓮花萬歲麻曰太和二年烏程閣下忽生蓮花方是唐憲宗中興諸道皆用兵而江南稍安息蓮本水產而生於閣下亦和氣所孕毓也

春申君故宅辨郡志載春申故宅在烏程縣南二十五里卽下菰城新志亦以爲城邑皆非也按東坡集隋書地里志黃州永安郡有永安城圖經謂春申君故城蓋非是春申之居乃在吳國今無錫惠山有春申君廟庶幾是乎又張表臣曰黃之永安爲春申故城蓋始封也後楚併吳乃請吳之故宮都焉然行相事未嘗去國所以有廟者後人作之也又史記楚封歇爲春申君賜淮北十二縣後十二年復獻淮北地請封

於江東因城故吳墟以爲都邑今姑胥城內西北隅
四縱五橫之迹可攷則無錫已自不居況吳興非所
封耶今所謂下菰城者蓋春申伐吳時築壘屯駐之
處其四壁門可證又按春秋楚子重伐吳克鳩茲至
於衡山今下菰城正在衡山之南其爲屯駐之處無
疑矣

顓頊冢按顏魯公吳興地記云烏程縣境有顓頊冢圖
經云晉初衡山見顓頊冢有營壘圖今予攷皇覽云
顓頊冢在東郡濮陽頓丘城門外廣陽里中山海經
曰顓頊葬鮒鰭二處之陽卽今溫縣地不知顏公何
不深究遽信圖經之說

黃浦誌以爲黃歇所開故名殊非也按顏魯公妙喜寺碑內云寺前二十步跨澗有黃浦橋其源出自杼山西南五里黃檗山其澗因名黃檗澗其北出爲浦因名曰黃浦其傳譌之久乃以松江郡治南所流大浦東北出范家河者亦名黃浦郡誌亦附爲黃歇所開其謬益甚

卞山楚王神廟梁簡文帝作碑記之盛言事佛不殺則非項王矣湖人舊稱項爲卞山王或卞山別有項王碑自漢而來事佛不殺者惟楚王英耳雖荆王劉賈亦非事佛者卞屬故鄣爲丹陽郡管內爲荆楚之封耶或曰唐正除有項王蔬食文則項王亦或嘗事佛

者然簡文之碑未嘗一言及於項而正除之文不過因簡文之碑而附會蔬食之意也又江總卞山楚王廟詩末云英威言幾何此當爲項廟也

歐陽亭在烏程縣歐餘山之陽越王句踐之後受封此山之墟

沈亞之故宅在烏程西南二十里地名小敷山卽舊誌之福山見杜牧之弔沈下賢詩

朱氏怡雲閣見石林避暑錄話圓證寺大松三十餘株夾道蔽日猶國初時故物石橋合諸澗經朱子怡雲閣之前其深處水面闊四五丈張文規所謂金碧潭者也其下流注朱氏子嵩之圃噴薄激射交流左右

去吾廬不滿三里

碧琳池按石林避暑錄云吾居東西兩泉西泉發於山足蓊然澹而不流匯而爲沼纔盈丈許溢其餘流於外吾家百口汲者繼踵終日不耗東泉亦在山足而伏流決爲澗經碧琳池然後會大澗而出旁澗取以灌園皆此水也兩泉皆極甘不減惠山而東泉尤冽珍珠泉在飲馬池之下平地居民以溉田可百畝

白雲泉在金蓋山北麓亦乳泉也見山墟

瑤席池在道場山上方

眞珠泉在妙喜寺

烏程侯井在縣東北孫皓時所開

放生池唐乾元二年春三月詔洋州之興道泉山南劍
南黔中荆南嶺南江西浙西諸道迄於昇州之江寧
秦淮太平橋臨江帶郭上下五里各置放生池凡八
十一所顏真卿作放生池碑又乞御書題額
元張翥伏日陪吳興諸府公宴魯公池云芙蓉池上會
羣公滿意華筵笑語中虹影連蜷山外雨荷香淡蕩
晚來風歌催銀甲箏逾急涼入金尊酒易空我亦玉
堂揮翰手題詩合在水晶宮

相國池烏程令李晤誕相國李紳于縣署幼弄之歲墜
於治廨之東池逾數刻若有物翼出因名

蘇公潭烏程秋曹掾蘇許公頽釋褐之職兼戎務上已

節郡有角櫂之戲司戎者乘小艇往來檢飭因覆於城南潭中俄聞空中言無損許公因獲出無恙後人因其貴而名潭爲蘇公云

貴涇浦在霅谿西南岸梁時蘇氏女遇五采龜而生女爲陳武帝后因名

太子匯在卞山東吳封孫皓之父於此而皓繼吳統因名其舊迹也地產楊梅

釣魚灣在烏程西北三里都官郎中張先釣於此因附名

花渚在梅谿鎮吳越征西將軍吳瑗居此而構花石甚麗因名

玉帶潮安吉銅山鄉許夫人墓前早晚兩潮高尺許
靜蛙池安吉西常樂寺側蛙鳴聒耳開山肇法師翦紙
蛙投之卽止

四龍湖安吉東二里龍清觀左吳越王以望氣者言此
地有王氣使人鑿之忽有四鵠飛出化爲四龍

蛟龍池天目山東南瀑布下注數里蛟龍時見於此
乳泉井長興鼓吹山下其色白煎茶甚佳

玉寶泉長興西南六十里深廣皆二尺色紺碧味甘唐
處士鄭遨與道士李道殷羅隱築室泉口號三隱

金砂泉顧渚山貢茶院側唐學士毛文錫記云將造茶
時太守具禮拜祭頃之發源清溢供御茶畢水卽微

減供貢茶畢水卽減半造畢水卽涸矣唐貢茶水二銀瓶宋初用一瓶其後茶與泉俱不供至元時水大發雖茶畢不減我朝惟供南京奉先殿茶耳

月泉在武康慈相寺泉出石隙形如半月舊有披雲閣後易名清暑閣呂祖謙月泉疏云斷崖吐月纔出半規古蟄涵星尙懷全璧久矣寶匱之廢遐哉玉斧之修護此寒清祓除氛翳名高詩社再傳和仲之符價重帝城復值文饒之運

聖井長興東九里廣惠寺左有五井晉永嘉中陳氏所穿陳高祖初生時一井泉涌出家人汲以浴之後稱爲聖井

花瀨長興水口陸龜蒙云花瀨濛

氣昏水邊山曲

更容邨

五亭唐郡守楊漢公立於白蘋洲一曰白蘋亭二曰集芳亭三曰山光亭四曰朝霞亭五曰碧波亭見白居易易五亭記

歸鴈亭宋孫莘老治湖時作於天慶觀中道士山宗悅乞名於東坡坡以歸鴈名之方是坡判杭州運司差往湖州相度隄陴利害因題曰蜀客南遊家最遠吳山寒盡雪先稀蓋以自寓思歸之意

三癸亭在杼山寺之東南顏魯公以癸年癸朔癸日建陸羽因以三癸名之故魯公詩云歛構三癸亭實惟

陸生故

谿光亭在歸安縣前開禧二年邑宰鄭昭先建

六客亭在郡圃中李公擇爲守時張子野劉孝叔楊元
素蘇東坡陳令舉會於碧瀾堂子野作六客詞後東
坡與曹子芳劉景文蘇伯固張秉道會於郡圃繼作
六客詞亭蓋後名也

鷗波亭在子昂故宅之左今爲旗纛廟

車蓋亭殷康所建在車蓋山

昆山亭柳惲建

五花亭唐刺史韋景先所建以唐選士用五花判事爲
韋氏所建白故以名亭在峴山南麓

麗澤亭愛山亭俱在郡治治平三年張大寧建

雲泉亭在璚市普賢寺

陵亭在長興縣腳嶺下建安二十三年孫權嘗捨虎於

此後沈法興將蔣元超與李子通戰陵亭卽此

左顧亭在德清餘不谿上孔愉放龜之處

明月亭在武康明月洲上

碧瀾堂攷堂乃霅谿館中堂名也杜牧之佐宣城時來

遊吳興爲書堂扁作霅谿館詩劉長卿南謫時亦寓

其中有作吳興自郡齋外凡治中別駕之廳俱名爲

館惟霅館以待過從之客歷千百年來館名雖泯而

碧瀾之名獨存蓋重牧之也張廉有重修碧瀾記竟

不知其爲霅谿館在宋時陳堯佐題碧瀾堂云茗谿
清淺霅谿斜碧玉寒光照萬家誰向月明中夜聽洞
庭漁笛隔蘆花

西亭在吳興郡西二里烏程治南六十步跨茗谿柳惲
天監十六年正月所建嘗與郡主簿吳均同賦西亭
五韻後邑宰李清重修顏魯公有記宋天聖中縣令
方仲弓改爲浮玉亭

夢馬堂紹興三年朱勝非卜地於吳興華嚴山嘉會寺
前葬其母楊氏夜夢十騎入山留一馬繫於林中因
請於朝改寺曰崇因薦福寺豕前起堂名以夢馬

二吳讀書堂在花渚壤之後裔可幾知幾兄弟讀書其

中

叢桂堂在安吉東一里紹興閒朱三思三省兄弟叔姪一門赴南宮者二十有七人鄉里榮之以名其堂

東萊讀書堂德清慈相寺後有謝夢生記

韻海樓大厯七年顏魯公修韻海鏡源於杼山因建此消暑樓在郡南子城上今四城惟南樓猶敞蓋其遺也牧之佐宣城時來訪郡公崔元亮因題詩末云時陪庾公賞指崔也

浮暉閣賈收耘老所居在定安門內沈會宗詞云景物因人成勝槩無塵可礙等閒簾幙小闌干衣未解心先快明月清風如有待誰信門前車馬隘別是人閒

閒世界坐中無物不清涼山一帶水一帶流水白雲
常自在

茗谿漁隱云耵老水閣景物清曠會宗爲賦此詞阯
與水閣相近同在茗谿南岸予有句云三閒水閣賈
耵老一曲新詞沈會宗無限當時好風月如今總屬
續谿翁

鎮湖樓在郡城南

魚脯樓在儀鳳橋南埠之東昔歲貢魚脯於此修製至
今爲魚樓界

金婆樓在魚脯之東金婆好道築樓以居遇異人得太
乙養元之道後因尸解後有過洞庭湖者見之以隻